

# 嶺南學報 Lingnan Journal (1929-1952)

Volume 4  
Issue 4 第四卷第四期

Article 6

January 1935

## 潮州藝文志：卷六

E RAO

Follow this and additional works at: [https://commons.ln.edu.hk/ljcs\\_1929](https://commons.ln.edu.hk/ljcs_1929)



Part of the Chinese Studies Commons

---

### Recommended Citation

饒鍔(1935)。潮州藝文志：卷六。《嶺南學報》，4(4)，1-18956。檢自：[http://commons.ln.edu.hk/ljcs\\_1929/vol4/iss4/6](http://commons.ln.edu.hk/ljcs_1929/vol4/iss4/6)

This Article is brought to you for free and open access by the Scholarly Publications of Lingnan University (Guangzhou) at Digital Commons @ Lingnan University. It has been accepted for inclusion in 嶺南學報 Lingnan Journal (1929-1952) by an authorized editor of Digital Commons @ Lingnan University.

## 潮 州 藝 文 志

## 卷 六

潮安饒鍔鈍盦輯  
長男宗頤補訂

史 部

地 理 類

清

吳氏 仕訓 順治潮陽縣志 臧憲祖康熙潮陽縣志凡例。

未見

嘉慶潮陽縣志 十六文苑傳: 吳仕訓,字光卿,博治經史百家,比部孫如法訪結爲布衣交。萬歷丁酉,應省辟,師事吉水鄒南臯先生,潛心理學,得其正宗。初授福安學諭,士深感慕,轉爲福州郡丞,兩署卽符,尤善善政。拂衣歸里,值鼎革,咸賴德望鎮重得安堵,日惟講道著書,年八十六,無疾而逝。所著述甚多,潮陽安福二志尤見史才。吳穎曰:潮陽縣志成於林井丹先生,近吳光卿先生續之,余獲見其副本,雖多因林舊,而事則增於昔矣。(順治潮州府志卷首。)

鍔按: 吳孝廉光卿所輯潮陽縣志,道光廣東通志藝文畧不著錄,

傳稱其著述甚富，今皆不傳。惟吳頤潮州府志，載光卿有潮陽福安二志，皆見史才，後人修志咸本其語以綴於篇。然所謂潮陽志，今亦罕覩。考憲祖潮陽志凡例，言志自隆慶井丹先生修後，至順治四年，郡丞吳仕訓續修，未及梓，而海寇煽亂，故祇有藏稿而已。是此書當時雖成，實未付雕，即憲祖所見，亦祇殘本；今距憲祖修志又二百餘年，想其稿已亡佚矣。

李氏士淳順治程鄉縣志光緒嘉應州志二十九。

佚 光緒嘉應州志二十九。

士淳自序：古之擅長史學垂世立言者，莫不羅網前聞，逖稽往籍。咨舊章於先哲，探軼事於稗官，參稽百世之典，編成一代之書，藏之名山，俟之其人，成言班如布在方策，史顧不重乎哉！邑之有志，猶國之有史；然而區域之偏全既分，事實之掛漏互異，其大小偏全之別，不啻達之與隘，浮蹄之與河漢也。吾程之志經百餘年未及修葺，殘缺泯沒，次節不倫，豕亥魯魚，訛舛可疵，大夫之至於是邦者，何所徵信而考疑；後學之生長茲土者，何所景行而仰止？斯亦百年來吾邑一大憾事也。歲次辛卯，邑侯葛公，奉命臨蒞茲土，留心民瘼，矢志修舉；見學宮之頽圯，神祠之荒落，慨然於中，而力以興復爲已任，凡次第舉行矣。尤以邑志未修爲憾，命余首董其事，余惟文獻弗傳，士大夫耻之；卽徵俟命，何敢以不敏辭？於是召集故老，諏訪舊聞，局戶園圃，旁稽博採，因前志之舊，而討論修飾潤色之，詞之陋者文之以雅，意之僻者訂之以理，失次者爲之正其先後，殘缺者爲之補其罅漏，事有增新，制有考異，理之疑者有發明，音之訛者有詮釋，反覆討求，不厭詳訂；俾後之觀是志者，一啓卷間，而微言大義，較如指掌，古往今來，炳若列眉，闡提綱總論，則吏治民生士習世風臧否邪正勸

戒，昭焉可以興，可以觀，閱疆域分野，則天文地理土俗民情異同變遷時勢，判焉可以學，可以仕，閱官制科名，則設官分職興賢育才前徵後懿大觀，備焉可以法，可以傳，讀循良之譜，則曾井之甘泉可汲，元城之直節可風，數傳而後，蒙其休者，沐膏澤，咏勞苦，甘棠峴碑，奕世如新；誦名賢之傳，則程處士之高誼不朽，蔡蒙吉之正氣猶存，百世而下，聞其風者，頑夫廉，懦夫有立志，流風餘韻，後來接踵，孝子節婦，代有其人，既可傳之以維風；仙客羽流，事近於怪，亦可惜之以設教，雖常變殊遭，出處異軌，要以各成其高，不詭於正，有裨世道人心，其義一耳。遠則唐宋以來，事雖遠而可稽；近則明興之代，制益近而加詳。若夫因革損益，日異而月不同，則又非今茲所能豫定者，庶幾以俟後之君子。(光緒嘉應州志二十九。)

勝朝粵東遺民錄四：士淳字二河，程鄉人，弱冠中萬歷己酉鄉試第一，崇禎戊辰成進士，授翼縣令，戊寅行取入都，授戶部雲南司主事，歷官至翰林院侍讀學士。闖賊陷京師，士淳潛遁歸里，以著述自娛。順治癸巳以薦起用，有司敦促至再，堅辭不就，世比之王伯厚元遺山，卒年八十一。

[補]道光廣東通志藝文畧四：程鄉縣志，國朝葛三陽修，未見。嘉應州志：三陽蒙城歲貢，順治八年任，甲午修程鄉邑志。

[補]溫仲和光緒嘉應州志序：程鄉之有志，自前明嘉靖二十年，縣令陳應奎教諭賴全業所纂修始；繼而作者，則國朝順治十一年葛三陽爲縣令，邑人翰林院編修李士淳所手定，僅存殘本。(光緒嘉應州志卷首。)

鍔按：李侍讀士淳，明王章傳，道光廣東通志，光緒嘉應州志，並有傳。潮州府志選舉表，載士淳官至吏部侍郎，蓋南都以後所授官；士淳雖在家拜命，實未嘗出也。至烈皇小識，謂士淳嘗從賊者，

證之明季實錄，及明季北畧，殊爲厚誣。此志舊題葛三陽修，考嘉應州志官師表，三陽任程鄉令，在順治辛卯；而此志修於甲午，是時士淳方家居，蓋葛延士淳編纂也，志稱士淳修邑志，以備文獻，即指此。

陸氏 庚箴 康熙涑水志十卷 清學部圖書館方志目。

存 康熙十六年刊本。

乾隆潮州府志二十九文苑傳：陸庚箴，榜名禮，字迎侯，饒平人。崇禎壬午舉於鄉；未幾，丁國變，遯跡巖谷十餘年，不知塵世事。後起用涑水令，士蒙其教，民被其休。九載告歸，捐修桃源路四十餘里，壽八十一。著觀花閣留花吟，琴言，涑水志。

清學部圖書館方志目：康熙涑水志十卷，四冊，知縣陸庚箴修，（宗頤接：表下脫一歲字。）康熙十六年刊本，自序。

鍔按：涑水，直隸易州屬縣，庚箴爲令，在康熙間，通志著錄是書，入地理雜記類，非是；府志以庚箴爲明人，又攷之未審。

楊氏 鍾岳等 康熙潮州府志十六卷。並乾隆潮州府志卷首舊序。

存 康熙丙寅刊本。

楊鍾岳序：「……我潮郡志，不知始何年。有明郡丞車公份，於宏治間一修之矣；太守郭公春震，於嘉靖間再修之矣；至國朝順治庚子，郡侯吳公頤修之，去今二十五載，雖日月無幾，而滄桑多故，復虞遺缺，無以登諸簡編。果菴林公來守是邦，慨然以爲己任，日與縉紳士夫，考鏡圖經，蒐羅掌故，所謂嚴斧鉞於筆削，寓經濟於文章，其意豈有異歟？念余入閩督學歸來，計離潮忽忽十餘年矣。風景不免殊觀，見聞距能周至？漸無一得，何有三長？乃叨越教請，辭不獲命。竊向諸同人矢願曰：綜覈古今，文

與實副，庶鬱爲鴻裁，永傳來茲乎？然余因之滋懼矣：是非非，直道也；直道難行，匪今斯今，當有知我罪我者。不意二豎時侵，坐臥邱園之日多；積月成歲，未能與諸同人彙帙而分門，刪繁而舉要。及志將告成，始得肆力一覽觀焉；見其據事直書，非徒踵事增華，大而覈，簡而該，婉而嚴，麗而不靡，視昔有光矣，烏敢掩一時耳目，貽譏萬代哉！……」（乾隆潮州府志卷首。）

陳衍虞序：「……夫志，史之餘也。作史有三難：曰才，曰識，曰學；修史亦有三難：今昔異時，人事遷變，攷據之難一；遺文放失，博訪難周，簡編缺殘，豕亥莫辨，覈實之難二；獨輯則孤掌不鳴，衆撰則意見競起，平情之難三。潮志續修於吳郡侯穎，將歷三紀矣。天道十年一小變，人事因之。潮遷斥之餘，兵燹頻興，半壁淪陷，賴威命震疊，烟消燧寂，而山川疆域，能無高谷深陵之異狀乎？土田租賦，能無盈縮豐儉之殊情乎？往者召募徵調，奔命不遑，今兵制能無變更，尺籍能無虛冒乎？圜橋璧水之瑋觀，青青子衿之講業，能几筵如舊蛾子時術乎？若風俗，若選舉，若人物，有一不覈，將何以昭勸懲，垂來茲歟？郡侯果菴林公壽之熟矣！先生筆挾風霜，義嚴斧鉞；猶以事關對揚，謙遜不遑。爰咨之鄉達，采之芻蕘，缺則補，訛則正，蕪則刪，疑則覈，幽則闡，踰年而志成，星紀昭然也。所以調燮之者，寓此次；提封井里，燦如列眉也，所以經理之者，寓此矣；田賦租調之制截然也，所以節宣之者，寓此矣；問宮牆，則霞麗星輝，問祀事，則肥腯告虔，菁莪之化，明德之馨，寓此矣；問兵防，則壁壘森羅，封守慎固，先事而綢繆，後事而克詰，寓此矣；風俗物產不無少變也，所以轉移維挽之者，寓此矣。表幽芳於千禩，彰烈節於今茲，文章增炳蔚之光，災祥紀人事之召，大而鹽屯，小而榷務，一一皆綜古今，關政治。先生條畫已詳，搦管

者特踵其事而點染耳。獨怪煌煌距典，謬及山毛。自揣揭婦已老，江毫全枯，漠然從諸公後，妄稱敷文摛藻，是七襄雲錦，而雜以腐絲也。幸提綱挈領，有郡紳；採隱搜幽，有良友；碌碌囚人，附名方策，有甲在面矣。所願讀志君子，憫東野之馬力，吹懈谷之鳳音，鏡古準今，黼黻盛治，是吾貞太平之笙簧也。郡人陳衍虞撰。(乾隆潮州府志卷首。)

王岱序：郡之有志也，例也；不獨潮爲然也。志之議修，亦例也；不獨潮爲然也。不獨潮爲然，謂潮爲獨異者，以地之異，時之異，主修者之異也。其異者何？蓋山川如故，則有陵谷之移；時代遷流，則有風景之別；人文日變，則有隆替之殊。潮自漢以上勿論，當唐宋時，方以炎方澤國，與魚龍爭處，士鮮詩書，民病瘴癥；其後風氣漸開，山川文物，皆爲丕變，幾與吳楚並駕；猶不免謂瀕海，習俗多事魚鹽，輕生患難，致萑苻易覈。故自明中葉不靖，迄國初，鳴嘯狐鳴，致煩薄伐；當軍書旁午之際，吏疲拮据，民勞征輸，日不暇給，遑問志事？及幻蜃既消，狂颶頓息，而哀鴻復渚，故燕還巢，寧輯方來，亦復難徵文獻；縱草野紀聞，掛一漏萬，以故志事缺然。乃郡守林公守潮數年，以經術經世務之才，綜核諸大政，函鼎烹鮮，庖刀游刃，悉已奏最而蕩平；適遭志事遂興，興會之逢，于斯爲甚。且與耆舊陳園公林介文兩君，筆削點定，草創藁成，復就余楊諸先生釐正之；將數十年未紀之事，旁蒐廣輯，如是缺者悉補，陋者悉文，訛者悉正，麟麟炳炳，蔚然大觀。是潮志之獨異，信不誣矣！余適待罪澄海，與陳林兩先生爲故交；因得竊窺其書，深嘆馬文班實，二者俱備。方未敢贅辭，而公謬以余爲知文，命贅一言；余下吏姓名，殊不足辱簡端，謹述其三異以對，澄海縣知縣湘潭王岱撰。(乾隆潮州府志卷首。)

林杭學序 (乾隆潮州府志卷首) (不錄)

吳興祚序（乾隆潮州府志卷首。）（不錄）

李士禎序（乾隆潮州府志卷首。）（不錄）

斐憲度序（乾隆潮州府志卷首。）（不錄）

胡戴仁序（乾隆潮州府志卷首。）（不錄）

楊佐國序（乾隆潮州府志卷首。）（不錄）

陳其政序（乾隆潮州府志卷首。）（不錄）

余艷雪序（乾隆潮州府志卷首。）（不錄）

〔補〕康熙潮州府志凡例一：郡乘卽古諸侯史也。蓋一府文獻所關。攷潮州志修於明弘治中郡丞車份，復修於嘉靖中太守郭春震。事蹟百年，朝經物改，殘編蠹簡，缺畧相仍。至國朝順治庚子，郡侯吳頴始奮然議修，稱爲信史。後郡侯魏槐祥續修，逢亂中輒，距今又二十五年矣。兵燹頻經，規制不無少異，修之敢憚煩乎？予不敏，起而從事，凡原本有不可易者仍之，後來有不可已者增之，勿侈勿浮，無偏無黨，踵事增華，予亦不知其固陋也。（康熙潮州府志卷首。）

嘉慶澄海縣志十八循吏傳：楊鍾岳，號大山，蘇灣人，順治辛丑進士，授館職後，改部出監通州。庚戌，充會試同考官，出爲福建督學。升參政，以憂去；服闋赴補，卒於京。鍾岳後徙家海陽之仙樂鄉。

清學部圖書館方志目：康熙潮州府志十六卷，二十冊。知府林杭學修，康熙二十五年刊，自序。

〔補〕道光廣東通志藝文略三：潮州府志，國朝林杭學修，楊鍾岳輯，未見。周志：杭學江寧人，由生員保舉，康熙十六年任，甲子重修府志。（宗頤按：林杭學，見乾隆潮州府志三十三宦蹟傳。）

鍔按：康熙潮州府志，道光廣東通志藝文略題，「知府林杭學修，郡

人楊鍾岳輯。」光緒海陽縣志本之，亦以鍾岳著錄。攷王岱敘文，此志定稿出於陳園公林介文二君，大山不過稍爲釐正而已。顧各志既題楊鍾岳輯，茲姑仍之，而附辨於此以備攷。

宗頤按：康熙潮州府志共十六卷。以十志爲綱，分爲二十八條，每條有序，較順治間吳頤所修之志，詳而有法。林杭學敍此書，言開局脩纂，始於康熙二十二年七月；越二十三年十月而志成。是此書前後共費十五月，始克完編也。舊題此志爲林杭學修，楊鍾岳輯；據王岱序文，知撰稿實出陳衍虞林雋胄之手，而楊鍾岳余艷雪則負較訂之責耳。政府縣志楊鍾岳傳，不載其有修志事；而楊鍾岳所譏是志序曰：「叨越敦請，辭不獲命」，又曰：「不意兩暨時侵，未能與諸生同人，彙帙而分門，刪繁而舉要，及志將告成，始得肆力一覽觀焉。」由此可知鍾岳雖被總纂之責，實未能始終其事也。攷普寧志林雋胄傳，稱郡守林杭學，高其行，屬修郡志，可爲雋胄參纂此志之別證。又陳衍虞所著詩弁三十篇。（又名郡乘代言。）其文與是志各門小序，大同小異，即當時草稿，更加訂定者。此尤足證康熙潮志，譏稿多出自衍虞手也。

陳氏衍虞郡乘代言一卷 光緒海陽縣志藝文略。

存道光己亥補刊本。

張履吉序：士不得志於時，輒自放於山巔水湄之間，以抒其抑鬱；興至，往往發爲文章，而或感憤無聊，牢騷激烈；是何異漁陽罵座，雖行胸臆，情性失矣。余自辛丑歲，待罪鎮陽；知粵地文章，肇自陸大夫新語以開其風會，繼復韓吏部命師以司其教鐸。潮之人士，咸篤於文行；其後校

騰鳳起，代不乏人，而園公先生獨以文章鳴天下。顧匏落一官，未能揚眉吐氣，激昂青雲，一展其胸中之蘊，而鬱鬱以老。今春秋八十，高矣！余適復浪遊韓江，寄跡於先生之別業，因得縱觀其所爲蔚園諸稿；其氣浩以博，其詞蔚以炳，滔滔汨汨，卓然爲世大觀，豈非山川間氣，篤生異人，而發其光於行墨者耶？近以海宇廓清，疆域遼遠，聖天子加意志紀，文獻之徵，非先生孰與歸？迺復示我潮志弁言，且屬余數行奉報。捧讀一過，則見其中自天官地紀，以及文章政事風土人物之類，靡不兼該；氣取於兩漢，而綵擷于六朝，或如商彝周鼎，古色紛披，或如曲礪幽泉，別致錯落，而一種深心大力之致，又復宛轉爲人心世道，時下一礙，謂非煌煌大文，足以垂世而立教者歟？夫詩以道性情，書以道政事，禮以坊塗，樂以節和，易以道變化，春秋以道異，六經總爲世道人心計耳。今觀園公之文，何一字不造巔極頂？又何一字不砥柱迴瀾？閑中肆外，舉法吐經，以視世之感憤無聊，牢騷抑鬱，徒自寫其不平之氣，如文長之廣誕，民懌之豪放者，其相去直如瓦缶洪鐘，大徑庭矣！因不揣菲陋，聊綴數言於簡端，康熙歲次癸亥仲冬日錫山張履吉書於韓江之鍛圃。（郡乘代言卷首。）

邑乘論一卷 光緒海陽縣志藝文略。

存 道光己亥補刊本。

序錄一卷 光緒海陽縣志藝文略。

存 道光己亥補刊本。

鐸按：右三書附刻於蓮山集後，郡乘代言一名誌弁，自星野至雜記，共三十篇，篇末並有王山長張容庵評語，蓋園公於康熙甲子，被聘修郡志時作也。邑乘論凡兵防、兵事、選舉、學校、貢賦、徭役，共六篇，寥寥數頁，疑非完書；序錄一卷，則真集園公所撰各縣志書序

文，別錄單行之本也。

蕭氏 紘錫等 康熙潮陽縣志二十卷 嘉慶潮陽縣志卷首舊序。

存 康熙戊辰刊本。

臧憲祖序，(嘉慶潮陽縣志卷首)，(不錄。)

宗頤按：此志阮通志藝文略三，僅題主修者知縣臧憲祖，(憲祖，廣寧人，康熙二十一年由監生任知縣，見嘉慶潮陽縣志十五。)故世稱之爲臧本。志分十二門，據憲祖序，編始於康熙丙寅仲冬，竣事於丁卯孟夏。纂輯者，蕭綸錫，鄭振藻，姚喜臣，吳紹宗；校訂者，林映日，陳長民，蕭金聲。綸錫，縣廓人，康熙癸卯舉人；鄭振藻，南桂人，順治丁酉舉人，官息縣知縣；姚喜臣，崇正貢生；吳紹宗，康熙貢生，仕清遠訓導，俱見潮陽志十四選舉表。

羅氏 國珍 余氏 元起 康熙揭陽縣志 乾隆揭陽縣志六賢達傳。

未見

羅國珍序：「……揭處海澨，秦漢間，潮皆揭地；至宋宣和，卜治玉窖，而邑仍以名。建置來，有聲東粵舊矣。閱歲五百有奇，志之修也，僅一再見。明季時事變遷，地成戰壘，其不爲狐宅茂草者幾何矣！且也，葛茭之應，傷乃民隱，滂沱之災，時切禾稼，蠹粉蠅涎之際，猶有問邑乘而執筆從事者乎？我朝重熙累洽，百廢維新；邑侯鄭廉水先生，以貞史才，來宰是邦，握機而化，吹薰以字，浸浸乎蒼蕪之起矣。乃鞅掌公餘，留心文獻，慨然以志事爲己任。遂開局延訪，或斷簡之猶存，或老成之未謝，博采宏蒐，補其缺，芟其蕪，明其微，闡其幽，不佚舊，不侈新。體裁既具，屬余成編，俾分門彙帙。寧慎毋濫，寧質毋文，寧核毋私，要惟存其可信可傳者。維三代之直，以公斯博已爾；風雲月露，將安事也？是則先生志也。由一邑

而之天下，憲以是焉，勸以是焉，觀政以是焉，觀教以是焉。先生之化成，固於茲時吉光之片羽矣。」（乾隆揭陽縣志卷首。）

鄭濂序：「……揭邑自宋宣和迄明崇正，閱歲五百有奇，志凡兩易。自崇正初歲，歷我朝，至於今幾六十年；較諸前志之相距，似未云遙也。而此際之缺略，有更難稽核者。何則？鼎革以後，屢易滄桑，揭處四戰之衝，方諸前古，無此頽毀，較之諸邑，倍甚凋殘，詢口語則老成既往，蒐別集則典章散棄，文獻之缺，所由來矣；兼以舊志板焚，僅存殘帙，一線不續，將並古昔之遺留而全佚之，何論此數十年來廢興大事耶？余膺綏此邦，每慨然以邑乘未新爲念。茲承上憲檄修，乃旁搜遺書，博采群議，手纂志稿，請大山楊先生纂修之。維時先生初值內艱，以未遑涉筆辭；延聘孝廉余君明偉，羅君登藏，彙輯而核增焉。二君穀芸窗之業，而闡精討論；余亦停簿書之冗，而專意釐定。凡數月而志成，爲綱十，爲目七十有奇云……」（乾隆揭陽縣志卷首。）

余元起序（乾隆揭陽縣志卷首。）（不錄。）

林杭學序（乾隆揭陽縣志卷首。）（不錄。）

乾隆揭陽縣志六賢傳：羅國珍，字登藏，藍田人，康熙丙午舉人。丁卯，邑令鄭濂延修邑志。余元起，字明偉，漁湖人，順治甲午舉人，夙有名，邑宰鄭濂延與羅國珍同修邑乘。

〔補〕道光廣東通志藝文略三：揭陽縣志，國朝鄭濂修，未見。李志：（宗頤按：李志，即乾隆甲辰李國華所修志。）鄭濂，餘姚人，康熙二十二年任揭陽知縣，丁卯增修縣志。

宗頤按：乾隆揭陽縣志凡例，言縣志三修於國朝康熙丁卯，纂輯者，邑令鄭濂，增校者，孝廉余元起，羅國珍，核閱者，教諭李

英，訓導李廷鎭。然濂序文謂「手纂志稿，請大山楊先生纂修之，維時先生初值內艱，未遑涉筆，辭，延聘孝廉余明偉，羅君豈藏，彙輯而校增焉。」據此，此志纂述之功，以余羅二人之力為多，揭志以纂輯專屬之鄭濂，實有未合。

張氏經等康熙惠來縣志十八卷道光廣東通志藝文略三。

未見

張經序：志者史之餘也。周官小史，掌邦國之志，以達於王；志之通於史，由舊來矣。蓋以述往蹟，徵前謨，山川之廣狹，田賦之本末，兵農之利弊，人物之盛衰，於此稽焉。貴於典而核，直而有體，而後信遠邇，昭勸戒；非諛聞贗辭，所能垂金石，而樹不朽者也。惠建自前明嘉靖間，兵燹之餘，邑乘未遑。麓平林公，僅具其槩。嗣萬曆東壁游公葛惠，以文章政事著聲，錢穀之暇，留心文獻，博稽廣詢，裒輯成書。八十年來，玉改星移，前蹟新猷，識諸父老，未垂方策；兼以舊簡墨鐫，半為風雨鼠蠹，斷楮殘煤，亦同蝌蚪石鼓，官斯土者，常撫卷而致慨也。茲逢聖天子大修一統之典，邑侯持公張先生，敬承德音，蒐輯志事；猶以簿書期會，思慮未端，用諮詢野老之言，以廣軒輊之獻。余與二三同人，罔忖荒陋，謀野編輯，而進退筆削，裁自俟衷。沿革紀自建邑，猶春秋之重始事也；災祥兼言休咎，洪範之勤修省也；財賦分別折畝，漢治之剏中飽也；山川驛程必書，周室之慎封守也；公署雖廢必紀，懼以祐田易鄭璧也；選舉非生其地不書，不敢混楚材為晉產也。至於官師繫桐鄉之祀人，物首鄭公之教，芻蕘之言必徵，擊壤之音亦採，俾覽斯編者，可以見華路啓彊之苦心焉；可以覘清壘壘之大節焉；可廣德心而復幹年岐宅之舊焉；可遡風流而挹節義文章之美焉。夫索神駿者，在駿不在圖；然舍圖終無以得駿；鑄寶鼎者，貴鼎

不貴俗，而非俗終無以成鼎。則是書也，可謂澄治之成模，官師之懿鑒矣，寧猶訛聞詹辭乎哉？雖然，此俟在惠言惠，於是編見其一斑者也。俟之報國，不獨文章，異日崇勳偉績，更以有膺眷而紀太常者，余願俟之。康熙丁卯歲蒲月序賜進士吏部觀政邑人張經撰。（雍正惠來縣志卷首。）

張秉政序（雍正惠來縣志首卷。）（不錄。）

方應禱序（雍正惠來縣志首卷。）（不錄。）

道光廣東通志藝文畧三：惠來縣志十八卷，張秉政修，張經等輯，未見，康熙丁卯，見張昭美志，經邑進士。

宗頤按：此志修於康熙二十六年丁卯，修者知縣張秉政，（秉政字持公，陝西人，生員。）纂輯者，除吏部觀政進士張經外；邑人同修者，尚有南川縣知縣方應禱，（字維城，惠來都人，順治丁酉舉人。）貢生鄭國光，（字闇生，龍溪都人。）陳龍光，（字遠心，酉頭都人。）見雍正惠來縣志卷首。

林氏雋胄康熙普寧縣志道光廣東通志藝文畧三。

未見

汪溶日序：余庚申冬，典牧斯土，單車戾止，覩城郭傾圯，閭閻蕭索，官民舍居，廢燬幾盡。哀我人斯，曷克堪此？矢志撫循，教養休息，冀圖漸復元氣。凡有設施，必取前吏之廉能者而折衷之，求其坐而言可以起而行者，庶幾於昔人有合焉，而猶懼其弗逮也。今奉纂修一統全志，廣蒐各省邑乘，此誠一道同風之至治。顧余自惟一行作吏，簿書是亟，詞令未遑。况前志曰畧，余亦何敢自謂能詳？但阮公之編摩稽存，父老之傳聞可採，則前事者後事之師，於退公之暇而修輯之，亦云無曠厥職而已。故邑乘之設，非曰山水而必圖其形勝者，取其無分有分土之意也；非曰譜世家

而必紀其姓名者，取其善足以勸惡足以懲也；非曰錄菁華而必標其藝文者，取其有關於民生有裨於國計也。若夫學校爲人材之本，風俗爲政事之徵，與凡貢賦記享之規，求賢旌善之典，大約志之不可闕者，祇期搜羅靡遺，採訪得實，方敢補入，其一切鋪張繁詞，矯飾夸誇，既未協乎輿情，奚可垂之奕世，槩置不載，猶前此之寧畧毋詳也。倘後之吏斯土者，能以催科寓於撫字，明允行其鞠訊，徭役輕而供億省，豪強戢而奸宄消，是誠足以仰副一道同風之治，而共諒余輯乘之意也夫！知普寧縣事古黎汪溶

日。（乾隆普寧縣志卷首。）

彭浩元序（乾隆普寧縣志卷首。）（不錄。）

乾隆普寧縣志七鄉賢傳：林雋胄，字介文，銘琰子也。崇禎間恩貢，授職方主事，謝病歸，隱居崑山，郡守林杭學，邑令汪溶日，皆高其行，屬修郡志。

道光廣東通志藝文畧三：普寧縣志，國朝汪溶日修，林雋胄輯，未見。  
康熙丁卯，序載蕭志。

宗頤按：普寧建縣於嘉靖甲子，萬歷庚戌，知縣阮以臨學諭黃秉中始編志畧，逮康熙丁卯，汪溶日重修之，即此編也。（溶日六安州人，拔貢，康熙十九年知縣事，乾隆普寧縣志五官蹟傳有傳。）此編阮通志藝文畧題林雋胄輯，而乾隆普寧志卷首凡例，亦稱汪君修志，以編纂屬前主事林雋胄云。

陳氏琳等康熙惠來縣志雍正惠來縣志卷首舊序。

未見。

陳琳序：古先王建一統無外之規，復慮蔽繢垂旒，無以燭幽隱，迺命大行人採列國之風謠，而勒爲成書，豈以備觀覽廣見聞哉？亦曰風化闡

於政治，明乎四方俗尚之不同，而後紀綱可得而敷布也。邑之有志，猶國之有史。主斯土者，未有不悉一邑之情形，而能以施政教，同風俗也。邑志之修，又烏容已乎？惠來建置肇自前明，嘉靖間邑志之作，草創於麓平林公；後六十餘載，星源游公從而詳悉增修焉。嗣是滄桑改易，物換星移，向之詳悉增修者，盡於寒煙荒草中，不有起而修明者，何以善其後哉？今上端拱致治，垂數十年，文德誕敷，四方風動，特申大一統之典命，郡縣各紀，邑乘以待軒輊。邑侯張持公集大夫紳士，參稽考訂，纂輯成編，可謂論斷確而體裁定，是非嚴而勤戒昭。至於幅員山川財賦風俗人文孝德諸篇帙，靡不井井有條，班班可考矣。第自康熙丁卯歲，以至於今，又幾二十年矣。其間之疆土，保無變遷乎？賦役保無增減乎？風俗保無移易，人文孝德保無盛衰靡常乎？古稱天時人事闋一紀而必更張，况久遠乎？幸邑侯春谷先生，以名都碩學，來涖是邦，政簡刑清，百廢俱舉，慨然念二十年來，風土民情，山川要塞，及今又煥然一新。爰取前志而續修之，其發凡起例，悉依舊志而廣蒐博採，則屬不俟與諸同人；而總裁則查侯之巨筆，爲訂定焉。……史部侯選知縣邑人陳琳撰。（雍正惠來縣志卷首。）

查曾榮序：郡國之有志，蓋自周官昉也。漢司馬氏祖之，始作史記，其說散見於河渠貨殖諸書。厥後班孟堅創爲地理志，先漢郡，而後十五國之風，以補前人所未及；是志爲郡邑之史，而史爲天下之志，志有遺漏，猶史有闕畧也。史之創者，必本春秋編年紀月之法，紫陽提綱分目之規，以寓其序述，筆非董狐，才非左史，學非歐陽，未易贊一詞。若史之因者，拾遺補闕，如子長所云整齊世傳而已。是故創難而因易，易者易怠，爲之者轉似乎難，惟志亦然。惠來縣志成於游公張公，書有綱紀；第所載關係民社事，文頗多未備，而備者又未必盡皆可存。康熙甲申，案牘稍暇，

細檢舊本，謀所以修輯之；而猶虞謀野，雖獲無當大雅。因偕博士蕭君英漢，譚君永泰，暨二三同人，若林君昂，陳君琳，唐君寬，張君鍾輩，蒐求逸事，相與校讐，益以新條，授以舊例，亂者序之，缺者補之，訛者正之。若余之建常平，均丁口，修學宮，葺城垣，免兵船，設營堡種種，稍有補於民社者，邑之紳士亦強集於十有八條之簡端，以付梨棗。於是諸公謂余曰：「志之修如治詩之有經緯，千條萬緒，雜而爲彰；如齊政之有璣衡，三辰十曜，疏而不漏。孔安國謂土地所產，風氣所宜，皆聚於此；而鏡前鑒後，信而有徵者，殆於今日乎始矣！夫紀山川，考人物，驗風俗，察災祥，俾異日探風者，按序披圖，繪爲考成之書，輶軒報命，以備一統全書之大典，則是志即以爲葵陽之治譜也可。」余曰：「此非余之功也，特以濟前賢之不逮也。」故於告成之日，不揣鄙陋，而自序其頗末，以竊附於麓平東壁諸公之後云。惠來縣知縣查曾榮撰。（雍正惠來縣志卷首。）

翁嵩年序（雍正惠來縣志卷首。）（不錄。）

蕭英漢序（雍正惠來縣志卷首。）（不錄。）

林昂序（雍正惠來縣志卷首。）（不錄。）

宗頤按：此志續修於康熙四十三年甲申，主修者知縣查曾榮。

（曾榮字春谷，浙江仁和人，舉人。）纂修者，遠安縣知縣陳琳，（字玉山，西頭都人，康熙庚午舉人。）弋陽縣知縣林昂，（字東渠，龍溪都人，康熙甲子舉人。）副榜貢生唐堯，（字敬五，龍溪都人，康熙壬午科。）恩貢生張鍾，（字大石，亦龍溪都人，康熙戊子。）見雍正惠來縣志卷首。

楊氏之徐吳氏，康熙光山志十卷，乾隆潮州府志二十九文苑傳，清學部圖書館

方志目。

存康熙丙子刊本。

楊之徐序：王者之治天下，大都政教二端，而所謂政與教者，非取天下而束縛之，馳驟之也，要以因天地之寒燠燥濕，與夫民秉之剛柔輕重遲速，齊其政，修其教焉而已。此邑之所以有志，志之所以別域疆，詳分野，以逮居民食貨之數；然後可以出貢賦，供租稅，奉簿書，期會而敦教化，興禮讓，又復有上崇賢德，簡不肖而黜惡。諸典則政，政與教無不修不齊之憾，此志之所以經久而不敝也。光之有志，其來舊矣。上考分野，下詳輿地，而城濠邱廬，較若列眉，其間田原阡陌關梁津隘，織悉不遺，而採風問俗，凡一切節義人倫，足以爲砥世磨鈍之資者，無不班班具在，其亦云綱舉而目張者矣。但歲遠年深，興廢遞更，按舊籍而求之，而曰志在是焉；安知不類刻舟而求，膠柱而鼓也耶？不俟奉命令茲土，前者蒙大中丞閩公檄修光志，此前令所未逮，而不俟踵爲之；深懼簿書鞅掌，考訂不遑，有辜盛典。公餘之暇，迺廣詢闔邑紳士耆老碩人，凡前志所未載，與載而弗核者，悉芟蕪而增葺之。自輿圖分野田戶食貨，下逮藝文等目，雖曰仍前而汰繁去縟，續遺補忘，不無去取，要以無敢畧，毋敢濫，其庶幾因天地民秉齊政修教之遺意，竊願與後之君子，綜名覈實，而共懋乃績云。

歲康熙三十五年丙子孟秋朔日賜進士第文林郎和光山總事粵東楊之徐撰。（企南軒編年錄。）

乾隆潮州府志二十九文苑傳：吳羔，同邑楊慎齋令光山，聘修邑志，楚黃張太史希貞見之，嘆爲滄海遺珠。

清學部圖書館方志目：康熙光山志十卷，四冊，知縣楊之徐修。

蔡氏祖坤 卓氏華雍正揭陽縣志 乾隆揭陽縣志卷首舊序。

未見

陳樹芝序：秦戍五嶺，而後設縣曰揭陽，隸南海郡，揭陽蓋先郡而得

名也。迨宣和間，啓疆玉審，於是辨疆域於星文，列山川於地軸，有城郭宮室之壯，有禮樂兵農之宜，政治新而風氣開，爲前詰之官遊，爲名賢之挺生，爲道德文章之發越，治稱近古；而搜文考獻，編紀有書，則始前明嘉靖之朝。夫星分牛女，地屬楊州，嶺以南皆同；城郭壇壝，諸政必舉，亦置郡設邑所有。若憑高遠眺，天半高峯，戍守之故壘也；落漢鳴泉，朱子之芳躅也；三山叢谷之間，昌黎之祭界石也；麻田巖壑之際，子野之醉烟霞也；而政成俗美，名臣如季彭山，鄉賢如吳安成陳梅州；政事文學，虎炳豹蔚，非獨擅也哉。近以修一統志，奉文令郡邑，各上方書，余乃掃東閣，列圖籍，親楮毫，求舊老之傳聞，採月旦之輿論；延海陽副車蔡君祖坤，布衣卓君榮，襄其事；而貢賦一書，尤得我友傅君偉才任考核。自秋徂冬，既成，因付剞劂。其星野山川亘世不改，則仍其舊；文若城池宮室有修舉，署舍古蹟有興廢，禮樂兵農有因革，官舉其賢，人擇其偉，詞章登其大雅。蓋靈秀所鍾，德化所陶，衣冠文物，濟濟彬彬，歷千百年于今而獨鳴其盛矣。……雍正辛亥湘潭邑知縣陳樹芝序。(乾隆揭陽縣志卷首)

[補]道光廣東通志藝文略三：揭陽縣志，國朝陳樹芝修，未見。李志：  
(宗頤按：李志即李國華修乾隆揭陽縣志。)樹芝，湘潭人，雍正四年，知揭陽縣，辛亥重修邑志。

光緒海陽縣志十五：蔡祖坤，雍正四年副榜。

宗頤按：乾隆揭志凡例，稱志四修於雍正辛亥，裁閱者邑令陳樹芝，分纂者，海陽副貢蔡祖坤，布衣卓榮也。又據陳樹芝序，志中貢賦一書，則爲傅偉才致核云。

謝氏元選雍正惠來縣志十八卷道光廣東通志藝文略三。

存雍正庚戌刊本。

謝元選序：邑之有志，不自茲昉也；前乎此凡四纂修矣。遡縣治之建，自前明嘉靖四年乙酉，垂三十載。甲寅，邑侯麓平林公始創邑志；比五十六年，萬曆己酉，邑侯東壁游公重修爲十二卷；又七十九年，國朝康熙丁卯，邑侯持公張公，奉文重修，此十八卷所由來也。厥後十有八年，甲申，邑侯春谷查公從而續焉。欽爲我皇上御極以來，德洋恩普，教化覃敷，山陬海澨，瞻雲就日，咸切觀光，乃宸慮所及，無處弗周；以志乘所關，爲典最鉅，特命直省郡縣，彙輯成書，備修一統通志。於是邑侯張公崑巖先生，以關西名賢，栽花茲土；政通人和，百廢俱興，開局於察院舊治，集紳士纂修。余不敏，謬膺搜求編校之役，俟出其鴻才卓識，矢慎矢公，恪任厥事，凡四閱月而成。舉凡輿圖沿革山川城郭學校武備，與夫戶口田賦風俗物產古蹟人物詩賦文藝，分門別類，接古續今，遠自乙酉，近及庚戌，上下二百六年之間，有誤必正，有無必芟，駁而不遺，質而不溢，義例倍精，體裁咸得，夫誠可以昭勸戒，而孚遠邇矣。然則我侯固不特懋乃政績，而且著爲文章，視前侯麓平東壁持公春谷諸公所修，不且後先輝映乎？聖天子命石渠東觀之英，採萬國風謠，定一代之制作，其將取衷乎郡縣之志，孰有先於惠者？豈但備一方之文献也哉！時雍正九年歲次辛亥菊月原任湖廣荊州府石首縣知縣邑人謝元選頓首拜撰。（雍正惠來縣志卷首）

張炤美序。（雍正惠來縣志卷首）（不錄。）

胡恂序。（雍正惠來縣志卷首）（不錄。）

劉運鮒序。（雍正惠來縣志卷首）（不錄。）

侯淑旂序。（雍正惠來縣志卷首）（不錄。）

道光廣東通志藝文畧三：惠來縣志十八卷，張炤美修，謝元選輯，存，雍正庚戌，元選，邑舉人。

銘按：謝元選，道光廣東通志，乾隆潮州府志選舉表，並作蔡元選；云本姓謝，中式康熙四十四年舉人，奉旨復姓，官石首知縣。所輯惠來縣志十八卷，分十八門：曰建置沿革，曰星野疆域（城池坊巷都市鎮附），曰山川（關隘水利廟宇寺觀附），曰民賦物產，曰職官，（名宦附），曰選舉，曰公署，曰學校，曰秩祀，曰兵防，（屯田附），曰兵事，曰災祥，曰風俗，（氣候附），曰人物，（分鄉賢官蹟賢良孝義碩隱五門），曰節烈，曰寓賢，曰仙釋，曰藝文，書共六冊。

宗頤按：此志雍正八年庚戌修，主修者張炤美。（炤美字崑崖，武威人，順膳生員。）邑人與分纂者，除謝元選外，尚有陽江縣教諭陳天生，（字子長，惠來都人。）歲貢生朱翼，（字石崖，龍溪都人。）順膳生員張紹祖，（字啓材，龍溪都人。）詹敬文，（字孟銓，西頭都人。）增廣生員翁國正，（字隆渭，惠來都人。）見本志卷首修纂姓氏。

曉氏商乾隆大埔縣志嘉慶大埔縣志十七儒行傳。

未見

蘭嶠序：今世之爲令，欲爲邑之久遠計，必於志加意焉。蓋凡建置之始末，與夫名人碩彦出處之詳，幽正之士，孤嫠之懿，沈伏於山谷廬井者，不爲之追補遺亡，論次先代之風流，以傳於奕禧，將何以酌損益之宜，而彰勸懲之迹耶？予於壬戌秋，承乏埔陽，甫下車，得宋侯定山於康熙乙丑所修埔志一帙。久之，又得有明張侯藻一於崇禎九年所修補志一帙，因知邑志昉於有明嘉靖間之吳侯淑禮，惜無傳本可稽，前令之一修再修，母亦灰燼火傳之意歟。乃迄至今，宋之繼張而任纂輯者，逾五紀矣；所鑄棗梨，殘蝕剝落，散佚無存，則既深以爲慮。而此六十餘年以來，國家之仁漸義舉，淪肌冶體者，凡官府之章程，閭閻之風俗，賦役之增損，以及條

革行罷之故；沿茲土者，躬際其盛，苟紀載疎濶，簡冊闕如，遲之又久，相傳于田父野老之口，而士民或不盡知；雜見于野史家乘之中，而長吏難於必聽，其可慮更何如耶？顧予有志而久未逮者，其故何耶？孔子聖人也，入廟必問，非過慎也，見聞不及，則舉措懷疑矣。今已沿事有年，耳目之覩記，日熟以周，地方諸務，蒙各憲提撕俾獲，漸次具舉，殆庶幾乎政有餘閒矣。於是量捐廉俸，爲閭邑之紳衿耆士，倡開局；擇文行素優者，勤厥事。爰取所得舊志二帙，發凡起例，按欵分錄，共成一十二卷，每卷作弁言以啓其端，義有未盡，復有論說，以畢其緒。分目七十有二，事之未著於目者，附載之，所有舊志已訂者，不敢遺，其未載者，或增或補，詳核編次，則惟局中之學裕三長，才兼五到者賴焉。負百鈞而趨者，勇不必孟貴，力不期烏獲；途勝任而無難，則以衆擎易舉故也。是志也，藉二三同志，以觀厥成；匪惟張與宋志將絕而復續，抑亦俾吳志弗傳而若傳。後之有志修明者，覩興廢之因，而識善惡之蹟，一如堂室之已構，特在苦蕪藻繪之耳。彼固於力爲其易，而我亦可稍謝其責於後之人矣。乾隆甲子孟冬知縣蘭壽序。（嘉慶大埔縣志卷首。）

嘉慶大埔縣志十七儒行傳：饒商，前令蘭壽修志，延請主稿，詞嚴義確，人皆懾服。

道光廣東通志藝文畧三：大埔縣志十二卷，國朝蘭壽修，未見。洪志：壽，河南陽武人，雍正二年進士，乾隆七年任。以舊志闕畧，甲子，修輯成十二卷。

宗頤按：是志乃乾隆甲子間，知縣蘭壽所修。至纂輯者，先君以爲饒商。攷蘭氏序文，不明言輯者姓名，僅云藉二三同志，以觀厥成。按藍山撰饒商傳，（大埔饒氏族譜藍山孝廉質居饒先生傳。）言

山與公受蘭侯聘，同事志局，可知當時操黨政者，爲饒商無疑；而蘭序所云二三同志者，藍山蓋亦其一也。

又按：蘭嶃大埔縣志，埔邑有藏之者，聞其體例不及洪先齋志。據蘭序，其書共十二卷，每卷作弁言，以啓其端，義有未盡，復爲論說，以畢其緒，分爲七十二目云。

鄭氏之僑 乾隆鉛山志十五卷 清學部圖書館方志目。

存 乾隆八年刊本。

嘉慶潮陽縣志十六循吏傳：之僑登進士，甫釋褐，除江西鉛山令，兼署弋陽縣事。大計卓異，陞直隸保定知州。之僑起家縣令，所至政聲卓著。其在鉛也，修六橋以濟利涉，築三壩以資灌溉，條社倉事宜五則，以爲民便，撫軍陳制軍尹，均稱爲治行第一。

清學部圖書館方志目：乾隆鉛山志十五卷，十冊，知縣鄭之僑修。

宗頤按：此書江西通志一百三有著錄，作鉛山縣志，較清學部圖書館方志目多一縣字，註云乾隆八年修。

邱氏軒昂 乾隆鞏縣志 清學部圖書館方志目。

未見

光緒海陽縣志三十九：邱軒昂，字元澍，號名亭，宋進士翰林承旨成滿之後。康熙庚子，舉於鄉，癸卯成進士，授墨令。下車日，知民苦浮糧爲力請豁除，深澤之民，至今德之。乾隆甲子，補鞏縣，一以治深澤者治鞏。鞏近洛陽，爲宋東京，凡陵寢之在鞏者，多勢豪侵占，爲清釐得反故地，如呂相國二程祠歲久傾圯，捐俸修葺，丹堊煥然，人稱儒吏。

清學部圖書館方志目：乾隆鞏縣志，知縣邱軒昂修，乾隆八年刊，存卷二，一冊。

鄭氏大進 乾隆正定府志五十卷 浙江圖書館目錄。

存 乾隆二十七年刊本。

李氏永錫 乾隆將樂縣志 嘉慶澄海縣志十八循吏傳。

未見

嘉慶澄海縣志十八循吏傳:李永錫,字純之,號愛齋,蓬洲都金砂鄉人,乾隆丁卯舉鄉,戊辰聯捷進士,授福建將樂令。履任卽查明龜山楊公後裔,給照奉祀,纂修邑志,親加釐定,凡有裨於民生風俗者,莫不次第修舉。

饒氏慶捷等 嘉慶大埔縣志十八卷 道光廣東通志藝文略三。

存 嘉慶甲子刊本,同治癸酉重刊本。

洪光燾序:歲辛酉,大挑余分粵東,取道而南,越桂嶺,下瀧水,觀韶峰峩巍之奇,泊珠江,上越臺,臨五羊風濤之壯,慨然歎息,文獻清獻,異代齊名,其山川之秀偉滋演如是。待命數月,檄攝大埔,篆循江而東,歷龍川,度藍關,則一拜昌黎祠,抵潮州,陟韓山,則再拜昌黎祠,因及天水先生,遂就埔陽視事。埔山叢而峻,水清而駛,其物無奇贏,其人無厚殖,其小人愿而質,其君子惠而文,絃誦之聲,比屋不絕。又慨然曰:「古所稱海濱鄒魯者,庶其在此!」因披圖記以參觀其風俗,旁及物產,雖不離古文;近是,亦時或抵牾。又近載科名甚盛,而人物之建樹,藝林之著述,俱無可攷,蓋舊志之修也六十年矣。余深惟湮沒是懼,顧以初領事,未敢緩其所急。歲再期,樂其安閒,邑紳士亦以修志請,僉謀俱同,勉日開局,乃進同事告之曰:「潮之屬,土瘠賦薄,莫如埔;澑磨自喜,亦莫如埔。然而有自來矣;菁莪之盛,鄉校之牒也,是昌黎天水導之前路也;文山陸相之義烈,震蕩波濤,是我邑孤忠純孝之思也;濂溪白沙之詞翰,留題空谷,是我邑高

山景行之慕也。國家久道化成，修吾之志，將以扶世立教，六十年中，有似其一節者必謹書；他若質而不俚，詳而有體，錄不遺細，削不避強，此史家事，即諸君事也。」余不敏，亦執筆而從其後，凡四閱月，稿成付梓。若此中山川復有如文獻清獻其人，則以俟夫他日之修志者，時嘉慶甲子季春。

(同治大埔縣志卷首)

同治大埔縣志十七□□傳：饒慶捷，號曼塘，城坊人。乾隆乙未，捷南官，授翰林院檢討。性剛直，以不事權貴見黜。高宗南巡，進詩稱旨，復內閣舍人，年老致仕。嘉慶甲子，邑侯洪聘修邑乘。(宗頤按：邑侯洪即洪先燦，先燦湖北鵝峯州舉人，嘉慶六年署知縣，見同治大埔縣志職官表。)

道光廣東通志藝文畧三：大埔縣志十八卷，洪先燦修，饒慶捷輯，存，慶捷邑人，官庶常改內閣中書。

宗頤按：嘉慶九年大埔縣志，纂輯者饒慶捷外，又有張對墀，(見對墀傳。)此志主修為洪先燦，白書田，而世簡稱之曰洪志。其凡例言，仍前志續而廣之，為志十四，表二，傳二，所云前志即蘭塘志也。

[補]蔡氏繼紳等嘉慶澄海縣志二十六卷

存嘉慶乙亥刊本。

[補]李書吉序：邑志者，所以載一邑之事。雖一邑，而在天為分野為氣候，在地為疆域為山川，在忠臣孝子為義夫節婦，在循吏儒林，在隱逸耆碩，在物為黍稷稻梁，在禽魚草木，胥于志焉載之，其間予奪褒貶，又一秉春秋筆削之公，蓋志而史矣。澄于明嘉靖癸亥，析海揭饒三邑地以置，萬歷乙未，前令東陽王公，因邑紳南昌倅王公先有志稿，凜其蒐輯成之。吾朝康熙癸亥，湘潭王公來宰是邦，王公楚南名宿，與王漁洋諸先輩遊，老

不得志，謁選爲吏。澄自明季寇盜披猖，編氓流離竄徙，城池壇廟學校官廨市廛，久矣鞠爲茂草。當王公至，雖氛祲已消，而瘡痍未復；因出其胸中經濟，不遺餘力，爲之招流亡，鳩工作，惠農商，獎士類，一時再生，不啻邢如歸，而衛忘亡。舊序稱其視澄如家，視澄民如子，信然。乃復以其餘，悉心於邑志。夫續志易，創志難。王公承兵燹之後，舊志殘缺，不得已爲之拾遺編於風雨，徵故事于碣阡，蓬樞訪抱經之子，草廬諮詢之儒，夫而後能沿流討源，博采約取，凡夫天地人物之數，靡不犧然燦然。讀自序至「浮沈微祿，束帶低眉」，自比雕蟲刻鵠，夫亦可慨矣！自是厥後，雍正辛亥，則有前令稷山甯公，乾隆甲申，則有前令吳江金公，皆踵而增之，或垂四十餘年，或垂三十年，誠守土者責也。然祇續而非創，獨怪金公以疎畧訾議王公，抑何不諒之甚耶？試思澄之置邑獨後，旋遭蕩析，且金公攷證半資于郡伯周公府志，當王公時蓋未有府志也。金公又侈言商估奇贏，幅員沃衍，當王公時，殆初復業也。吉以嘉慶壬申，量移至此，卽首謁王公祠，竊心嚮往之，登堂皇則曰：「此王公之聽鼓排衙者也。」臨頸壁則曰：「此王公之釋奠祭菜者也。」歷川原則曰：「此王公之舒嘯賦詩者也。」循隴畝則曰：「此王公之命信夙駕者也。」于邑志亦復如是焉耳。然則吉何敢置斯志於弗講哉？况金公去今又垂五十年，日月易逝，廢墜誰執其咎？爰延孝廉蔡君薦、堂陳君敬、堂陳君眷、西，選拔陳君邃、初，副車李君實、園爲分纂，學博鄭君曉、園爲提調，少尹王君奎、莘爲收掌，茂才蔡君濤、余君光、先，陳君師、愚，余君之采爲採訪，開局於甲戌二月，成事於甲戌六月。夫所謂修志者，必芟繁增要，方足昭筆削之公。惟吉自維謬陋，才學識三者交疏，苟棄取未當，徒滋口實。夫作者謂聖，述者謂明。小子何人，而敢以修志自任哉？亦猶行甯金二公之道而已。間有補缺正誤，皆共事諸君之力。惟五

十年事蹟詮次，庶無遺漏，以俟後之更有王公其人者。嘉慶十九年七月  
中浣常熟李書吉序。（嘉慶澄海縣志卷首。）

〔補〕蔣攸銛序（嘉慶澄海縣志卷首。）（不錄。）

〔補〕嘉慶澄海縣志十七選舉表：蔡繼紳，下外人，乾隆甲午舉人，官茂  
名教諭。

宗頤按：嘉慶甲戌澄海縣志，阮通志藝文畧有著錄，題曰李書吉修。（書吉，常熟舉人，名見澄海縣志二十一職官表。）然據書吉序，纂輯者實為孝廉蔡薦堂，（即繼紳）陳敬堂，（名文思）陳眷西，（名鳴岐）選拔陳達初，（名光）副車李實園，（名寧）而學博鄭曉園，（名丙昌）則為提調也。

倪氏 明進 道光泌陽縣志十卷 光緒海陽縣志四十。

存 潮安城南書莊藏本。

倪明進序：邑之有志，猶國之有史也。志與史相為表裏，體裁大小不同，而義例則一。故作史有三難；作志亦如之。今昔殊時，人事變遷，考據之難一；采訪難周，蒐羅未廣，徵之或非其人，傳之不得其真，核實之難二；宜詳而畧，宜畧而詳，一人而傳聞異辭，一事而意見各出，纂定之難三。然此猶其後焉者也；地方官鞅掌簿書，日逐逐無餘閒，視此事為無關緊要，即有意修輯，勢不能不延知名之士以主其事：求之遠方，則人與地不相習，既課虛叩寂之徒勞；求之本籍，則親與舊或相蒙，又顛是倒非之不免；甚至因仍陋陋，傳笑四方。昔毛西河謂天下不可信者三：志書其一，誠有慨乎其言之也。泌為中州僻邑，宋元以前，寥寥罕紀；至勝國而文物聲名，彬彬稱極盛焉。惜鼎革之餘，書缺有間，我朝康熙年間，勅直省郡縣志送史局備纂一統全書。三十四年乙亥，前令莫公國芳奉大中丞檄始修之。

迨五十三年甲午，前令程公儀千復奉郡伯檄續修，今舊志是也。顧自康熙甲午迄於今，又百有餘年矣。其間變遷沿革，時異勢殊，籍賦有增減，建制有興廢，學校有隆替，人物有盛衰；與夫風俗好尚之丕變者幾何？嘉言懿行之可紀者幾何？苟不及今補輯，將日就湮沒，後之人尋墜緒之茫茫，其孰從而微之，而熟從而信之？道光五年乙酉春，余初蒞任，檢閱舊志：求莫志已不可得，程志僅有四卷，缺畧頗多，體裁亦不甚合。因思志書紀載，政體所關；余雖荒陋，豈可謂其難而闕焉弗講耶？承乏以來，幸比歲豐裕，民氣恬熙，如義學魁星閣普濟堂，以及署廨橋梁之類，凡有修舉，皆已次第就理。爰集邑紳士而告之曰：「彰往昭來，官斯土者之責也；徵文攷獻，生斯土者之資也。人事三十年一變，况百年乎？邑志之宜修也亟矣，諸君獨無意歟？」僉曰「唯命。」適前司訓河內栗君稼軒，有遊泌之信，君爲余選拔先後同譜，品行端方，學問博雅，曾贊修河內志，卓有可觀。且秉泌鐸將二十年，其於泌之風土人情，典章名物，靡不洞悉於胸。余聞之，喜勸助之有人，前所謂難者，今竟無慮是也。於是訂延來泌，共相討論，開局纂修，其體裁大鑿程志之舊；一依史家爲敘次，凡舊志所缺者補之，謬者正之，百餘年之間，山川人物，因革損益，發凡起例，綱舉目張，始於戊子二月，越十月而脫稿，爲卷十有二，爲目十有七，較程志增十之七八。雖其中掛漏舛謬，均所難免；而與栗君往反商榷，貼說傳箋，當公冗倥偬之際，挑燈揮汗，意匠經營，亦良苦矣。夫前事不忘，後事之師也。我國家重熙累治，久道化成，吏治蒸蒸，遠軼前古。宰一邑者當知一邑之事；而事所由知，以志爲據。必歷歷如指諸掌，斯在在可會於心。觀沿革建置，則思區分經畫，何以鞏固苞桑？觀疆域山川，則思扼險提封，何以綢繆未雨？觀賦役學校選舉人物，則思富教兼施，何以使民厚生而正德？觀

祠廟祥異風俗物產，則思神人胥格，何以使民康樂而安平？觀職官宦蹟，則思績著循貞，何以無慚尸素？觀古蹟藝文，則思言垂金石，何以不朽芳馨？余待罪於斯，瞬逾三載，自愧碌碌，未有善政善教，以大為措施；而民間之利病，無不刻係於懷。今成是書，亦藉以鏡得失，昭勸懲；庶乎張弛興革，有所持循，勤求治理，可告無罪耳。若謂妄操鉛槧，矜著述以備一方之掌故，則風塵俗吏，又安敢出此哉？時道光八年歲次戊子小陽月，知泌陽縣事，嶺南倪明進序。

光緒海陽縣志四十：倪明進，字千杰，號晉三。少慧敏，嘉慶癸酉，拔貢，朝考以知縣用，籤掣河南，時年二十三，有弱冠縣令之目。歷任鎮平夏邑桐柏泌陽等縣，所至多惠政，而泌陽為最。修泌陽縣志，倡建義學，興文教，士民德之，為塑像以祀。

〔補〕饒氏于簪等 同治大埔縣志十八卷

存 同治癸酉刊本。

〔補〕張鴻恩序：邑志曷昉乎？蓋自周禮外史所掌，而漢書郡國志即因之，所以考風俗之盛衰，見政治之得失；與夫山川阨塞創置沿革，使後人覽之而知注厝之方，非苟焉已也。天下萬城，近惟秦中諸志為最善。其時漢陝對山諸公以著作馳騁之才，生長斯土，上下數千百年，一人獨綜其成，故其書簡而有要，博而能裁，卓然自成一家言，後有作者靡以復加已。我國家累治重熙，沐日浴月之化，山陬海澨，莫不涵濡。據於潮偏在一隅，其山葱蒨以巍峩，其水清澈以揚波，其人崇禮義，敦教化，菜傭街卒，罔不知書，觀舊志所載，知素習使然也。邑乘凡數修，自嘉慶甲子迄今又七十年矣。人物之代興，風俗之美替，政理之醇疵，與夫城郭廨署增置之宜，道理山川經畫之迹，重規茂矩，缺焉弗詳，亦官斯土者所犁焉加意也。余

自己已恭承簡命，承乏茶陽，即留心此事。越三稔，則益習知其士夫之賢，與當務之急。爰與同志諸君，商設注籌，開局鳩工。秉筆者不他延，以經費小而邑人亟訓方之勞也；承舊者不妄竄，以形模具而作室無始基之易也；探訪慎則索米無譏，登選公則拔刀勿慮。始於壬申之孟夏，迄於癸酉之孟秋，為書一十八卷。既付手民，乃進諸君而告之曰：「治水者，龍門既鑿，不無衝突可畏之虞，惟未至而料其當然，斯四載是乘而元圭用錫；築室者，象構方新，亦有風雨飄搖之患，惟慎計而豫為區畫，斯梓人有傳，而繩墨誠陳。今之為此役也，既繙於費，復撓于事；余固持之堅，而諸君應以定，堅且定焉，雖有不成焉者寡矣！願與諸君濯磨乎吏治，涵詠乎道涯，以副聖天子稽古右文之意。雖不敢望秦中諸志，衆美畢臻；而由是以驗風俗，參政化，觀人文，使後之覽者知可法，而可守也。庶幾乎周漢之遺規，藉以不墜爾。夫一邑者，天下之積也，異日史家編纂，方此搜羅，而豈僅一都一邑之志乘云爾哉！」大清同治十二年癸酉孟秋月，誥授奉政大夫知大埔縣事南部張鴻恩謹并書。（同治大埔縣志卷首）

宗頤按：同治大埔縣志；倡修者，知縣張鴻恩，岑博霖，編纂者，邑人舉人饒于磐，內閣中書邱晉昕，吳世璣，及貢生陳兆容，楊德祥，何龍翔，張光遠也。舊志修於嘉慶，鴻恩續修，祇就舊志各門，續而廣之，未曾稍更其例，故志成仍附刻舊志之後，不別本單行也。

吳氏光緒豐順縣續志八卷

存 光緒甲申刊本。

許普濟序。（光緒豐順縣續志卷首）（不錄。）

王承堯序。（光緒豐順縣續志卷首）（不錄。）

鍔按：吳鵬，邑之橫坑人。同治壬戌恩科副貢，所纂邑志，一依葛  
曜乾隆所修志，增續門類，附刊其後，不別爲本；至同修姓名，卷  
首不錄，莫能詳也。

黃氏德容 翁氏荃 光緒饒平縣志二十四卷

存 光緒癸未刊本。

惠登甲序：邑志之作，昉於漢之郡國志。自罷侯國，置郡縣，所謂掌  
記時事，皆有史官者，固無其制；而代有成書，必資採擇。是邑志之不可  
無，猶史職之不可失也。饒自前明許公璧，創修縣志；嗣此羅公印凱，邱  
公金聲，續補增修，賴有傳人。迄我朝，而篇殘簡斷，幾失其傳。康熙間，  
賴劉公朴，特起而重修之，規模於大備，然至今已二百餘年矣。世遠年  
湮，文獻無徵，若竟聽其流佚，將風土人物盡成缺典，其何以備採訪，而  
徵事實乎？壬午歲列憲議修郡志，檄屬邑采輯成書，以待彙纂。時盧公蔚  
猷，任斯缺，特諭明經黃君德容，茂才翁生荃，蒐羅綴集。事甫行，而盧公  
卸事。余適承乏，感此盛舉；竊念吾慶陽府，及安化縣志，亦於康熙間增  
修，近因兵燹失墜，在家時屢費搜求，蕩然無存，雖欲如此續輯，而不可  
得。茲乃得與是舉，何幸如之？爰蒐綴舊文，採摭衆議，雖簿書日不暇給，  
而旁搜遠紹，正自樂此不疲；又恐採事觀變，覩記難周，更囑二子博訪周  
咨，參考互證，以共勸其事。閱數月，而彙帙成編，請余筆削釐正。余誠不  
敢辭其勞，而弇鄙無文之譏不免焉。惟是是非，采諸輿論，義例一遵前  
哲；其間若星野山川之相沿，疆域建置之未變，創垂既備，無事復贅；至  
於學校爲風化攸關，增設必叙自始；陂池爲水利所需，考核不厭其詳，田  
賦代有損益，可以徵制治之變通；職官時須代更，可以觀任事之優劣，以  
風有位，則名宦特書焉；以勵後進，則科名臚列焉。而况人物增都邑之光，

溯里居必述行誼，節孝扶綱常之本，表姓氏必闡幽貞，雖古蹟物產之間，寇變災祥之類，不必妄記失實，而聞見既確，例宜載筆。此外藝文一冊，採取似奢，惟有裨於吏治民生，亦甚賴乎徵文考義。綜核全志，殘者葺之，訛者證之，失浮者刪之，疑殆者闕之。敢曰志者史之流，特以轄境三百餘里，閱世二百歷年，不有記載其間泯沒者，何可勝道？亦宰斯邑者之憾事！爰是編續成書，上之郡憲，蒙採而錄之；省志或擇而登之；饒雖僻處偏域，亦庶幾與郡國志同有裨於信史焉！則不特爲饒邑幸，且爲續斯志者之幸也夫。時光緒九年歲次癸未冬月望日賜進士出身知饒平縣事安化惠登甲撰。(光緒饒平縣志卷首)

鍔按：光緒饒平縣續志，乃知縣惠登甲，延邑人黃德容翁荃等纂輯。書仍康熙舊志，增修附錄各門之後，與舊志合併梓行。德容光緒己卯恩貢，荃諸生。

#### 林氏達泉等崇明縣志十八卷

##### 存

林達泉序：自夏有禹貢，周有職方氏，而後世郡縣於是乎有志。自元至元間，州大夫採拾崇城故實，勒爲成書，而崇明於是乎有志。天下郡縣志之修輯，類不過三數十年，以其變遷多而湮沒易也。崇明介江海之交，孤懸巨浸中，波浪吞吐，魚龍出沒，風潮浸溢，滄桑倏忽，其疆域之廣袤，田制之沿革，政治之得失，風俗之盛衰，城郭建置之興廢，水利兵防之事類，人物古蹟之留遺變遷視他邑尤多，湮沒視他邑尤易，則其邑志固尤宜視他邑而及時修輯也。歲庚午冬十二月，予承乏崇邑，已下車，邑人士黃君德卿，李君丹崖，以重修崇明邑志書見□。蓋舊志之修，距今已百有二十餘年矣，何其失修之久哉？予以下車初至，吏事百未舉一，姑少待之。

越數月，李君已至滬上辦理輿圖局務，遂延黃君主局事，并任以補改舊書，纂輯新志之役；廣延邑中人士，共襄採訪分修之職，設局邑之同仁堂。未二月，余奉調御篆，乃以志事屬後任譚君少柳。閱一年，余奉制軍命，至上海清查制造局，適黃君亦在滬，出其所擬志稿見質，予披而閱之，蓋已見十之七八。體例嚴而事核，疆域之廣袤已瞭如也，田制之沿革已昭然也，政治之得失已備具也，風俗之盛已畢見也，城郭建置水利兵防人物古蹟之不一其類，已條陳之而件繫之也。變遷雖多，而能舉其變遷也，湮沒雖易，而能搜其湮沒也，黃君可謂不負予之所舉也矣。其後予刺東海，旋守臺陽，去崇益遠，崇邑志事遂不相聞。今年秋，得崇邑宰曹使君書以崇志將付梓請序于予，予于是感曹君與崇之人士能不忘予始創之人，不遠千里寓書見告；而又竊嘆予未任其勞，而幸與其成也。因為溯原于志之所由始，而道予所所與聞於崇志者如此，而爲之序。

黃德卿序。（不錄。）

宗頤按：林達泉，清國史循吏傳，續碑傳集，并有傳。（碑傳集傳文見下子部法家類。）崇明縣志一書，據林建泉序，知倡修者達泉，而負纂輯之責者，乃爲黃君德卿。是達泉未曾經其始，亦未曾觀其成也。此書民國新修大埔志藝文畧有著錄，故先君據采入云。

〔補〕李氏 光緒海陽縣志四十六卷

存 光緒庚子刊本。

〔補〕李芳闡序：前邑志有二，曰金，曰張。金志久佚，張志修於雍正庚戌，書雖存，亦垂百七十年矣。時久事積，文獻就湮。歲戊子，邑侯盧公藻帆，乃與都人士擬重修，籌畫經費，開局於郡北王公祠。諭分纂三：楊鏡川孝廉，陳鑑崖廣文與蘭，而董局務則專屬於蘭；固辭不獲，乃與諸君商

權義例，慎遴采訪，若邱芝田楊少山兩明經，皆日事勸搜，爲珥筆助。逮采輯甫集，遂商之盧公，延金山掌教番禺吳玉臣太史總其事。越明年己丑，編纂將半，而太史辭講席，艸稿隨行篋去；人事蹉跎，倏忽五易寒暑，甲午，楊明經赴省試，屬便道謁太史，攜艸稿歸閱之，挈領提綱，有條不紊。然其間如河渠隄防明金石新列傳暨襍錄各類率多闕如，其成帙者亦不免錯漏，時思與諸君同既其事，而陳廣文已先二年歸道山，所賴惟楊孝廉，忽又捐館；乃不揣固陋，引爲己責。丙申夏，約前采訪邱楊兩明經，重行搜采，而爲訂譌增闕，補綴成編，俾九似之功，不虧一簣。戊戌夏歲事，得卷四十有六。噫，自戊子庀局纂修，迄今十有一年，而始克就緒，難矣。然卒於有成，抑又幸矣。將付梓人，爲志其緣起，光緒二十四年孟夏邑人李蘭芳撰。（光緒海陽縣志卷首。）

〔補〕聯元序。（光緒海陽縣志卷首。）（不錄。）

〔補〕李士彬序。（光緒海陽縣志卷首。）（不錄。）

〔補〕池伯煌序。（光緒海陽縣志卷首。）（不錄。）

〔補〕光緒海陽縣志十六選舉表：李芳蘭舉人，撰授明高縣儒學。

〔補〕王氏定稿 郡乘劄言 焉用齋遺集上。

未見

〔補〕定稿自序：吾郡志書，前明宏治間，同知車份，有重修之舉。其稿草創于盛檢討端明。嘉靖間，郭太守春震重修；郭青螺先生負著述才，守潮僅傳潮中雜誌。國初，吳太守穎頤纂用之；次則林杭學胡恂兩守，亦有成書，今皆不見，惟傳周太守碩勳乾隆二十七年所修之志，而板爛敗已久。光緒間，張太守聯桂，開志書局，俄而忽罷。楊子和太守霽恐新志不成，舊志日歸澌泯，因摹舊志刻之；恨不廣爲搜羅，內物產類，仍殘缺之本，

且核讎疏舛，亥豕烏焉，觸目輒是。志後序，譏舊志門類編次之失，說本紀文達；自「白阜所圖」至「體例謹嚴」十餘行，全抄文達邑志序，不易一字。予非秉筆，不敢妄議，繙閱所及，偶有駁正，輒書于左；然于物產風俗兩門，尤多補正，名之曰郡志芻言，以備駕蕘之詢云爾。（鴻用齋遺集上。）

右郡志乘

（第六卷終）